

丑年之季冬計一千金有奇皆都督公清俸
廉糶也間有樂捐祇各盡片誠要于公無容
佐助予從祖宣侯掌教于茲偕其同官陳君
息亭率諸紳士等文于予以誌不朽予作而
嘆曰是舉也先聖所樂而萬代所瞻仰也
今夫士人自入學受經豈不知學宮之設聖
賢赫濯於斯多士藏息於斯斯文盛衰於斯
乎一旦身膺民社簿書耳錢穀耳訟獄耳公
而俸薪私而苞苴惟奉其妻妾焉利其子孫

焉飾其歌童舞妓焉又或美其宮室也侈其
陂池臺榭也以至祗園精舍道觀禪林捨身
罄產或不吝也若夫學宮未嘗或少畱意有
以頽壞來告問之學博問之諸弟子卽或倡
爲修建不過量効鎡銖而將伯助予因人成
事焉已也孰以爲已事不分任不旁諉者乎
夫閫帥元戎所司者詰戎治兵所謀者陳師
鞠旅而聖賢赫濯攸在可不知也多士藏息
之地可不知也斯文之盛衰可不知也今都

督公獨以爲已事不分任不旁諉況其清俸
幾何廉橐幾何捐千金而不靳且以幕府之
尊貴與工役胼胝而不惜都督公誠近古所
僅見矣聞修建之時所需木料皆干霄拂雲
不啻數千年來前此匠石求之竟不可得一
旦挺出數十株以供聖殿之用若有天造地
設以相都督公之成謂非精誠感格不致此
而公猶謙讓未遑以爲此
先聖之靈也諸君之福也予何修敢謂格天

哉其謙德雅量又加人一等矣抑考之史乘
欽之文物代不乏人唐有甯姜彪炳簡冊卽
至明代嘉靖以前科第蔚起近稍衰微矣豈
學宮榛蕪文教因而不振乎今都督公慨然
義舉鼎建維新予知聖賢之赫濯有依多士
之藏息有所斯文自此而日盛與前哲頡頏
豈惟都督公俎豆不祧已哉予從祖其與榮
施矣都督陳公諱誥字禹夫號三陟福建侯
官人與次崖先生桑梓

欽州浚泮池碑記

康熙七年

吳邦瑗

歲貢
郡人

嘗讀魯頌思樂泮水之篇其詞曰旣作泮宮
淮彝攸服因穆然于古昔先王作養人材振
興教化咸在於泮故天子辟雍水旋丘如璧
鄉射之宮半焉非徒以節觀者其意蓋有取
也欽雖邊徼唐德文姜公以直諫匡時顯于
建中興元爲時名相自後登薦賢書代不乏
人蓋扶輿磅礴之氣鍾爲人材豈以天涯有
異邇來鄉薦少歇雖曰地脉之衰亦因人事

之缺恭惟聖廟自都督陳公重修殿廡巍峩
門祠聳峙時因工程浩大廟外規模未極壯
觀繼而郡伯施公都閫劉公竭力經營新明
倫堂築宮墻建儒學門禮門義路修土地祠
葺衙齊學宮遂煥然改觀其間捐俸捐丁捐
廩自康熙四十七年經始五十一年工竣焦
思苦慮破費不計拮据不遑任勞任怨者則
學正胡師焉獨原日泮池編戶侵占欲復無
從聯陳浚復乃有爲之梗者爰陳于督學鄭

公批泮池關係文運仰州清查浚復州侯金
公毅然以泮之不復教之不興司土責也仔
而肩之倡議以欽州附籍出貢捐修學宮廩
銀俱在捐之助工其不足者各生優免丁銀
也衆皆踴躍募工伐石畚土浚池池原址橫
十八丈縱七丈以功浩費縮廣袤僅浚四十
二丈周甃以石深二尺五寸而學前之觀瞻
大壯矣因思昔日之泮湮淤湫隘鴛鴦鴟張
非侯力任曷底有成今泮水洋洋侯德湯湯

士生斯土當不以邊徼自限六經垂訓如日
中天五典五常含識而具復其在我曾非強
之本無故曰人皆可以爲堯舜又曰塗之人
可以爲禹工肆旣飭士醵而端多士游歌於
斯瞻仰謂何其反而求之有生之初毋局牽
於故識爭自濯磨漸摩旣久則名儒蔚起科
第聯蟬未必不自此日基之也紀其巔末屬
之貞珉云施公諱世驥福建晉江人金公諱
章三韓人劉公諱維翰山東陽信人辛未科

進士胡學師 教黃順德人甲子科舉人文

學吳邦琦洪應科丘岑岳黃秉良馮煒李朝

佐董事者也例得并書

靈山重建文廟碑記

康熙五十八年

李培仁

靈山令遼陽人

古之建邑也凡以爲教養斯民也養則謀諸
野教則謀諸學故邑必有學學必有廟廟之

中爲

先師殿殿前爲樂舞臺臺之左右有兩廡前有
戟門又前有泮池又前有櫺星門後則有啟

聖宮旁則有名宦鄉賢各祠其規制然也靈
之學自宋至明地凡數易迨兵燹之後規制
愈多未備歲丁酉余承乏西靈恭謁

先師殿而已若臺若廡無有也若門若泮池無
有也若後之啟聖宮旁之名宦鄉賢各祠更
無有也一望榛蕪四顧曠如求短垣敗壁而
不可得差乎地非文囿芻蕘雉胡爲乎來
哉余心竊怍怍動焉時有利生諱紹忠者歲
進士也進而請曰向者邑侯葉公欲振而新